

von dem Herzen des Mons gesagt / so werden die
Völcker der Landschaft / so vnter dem zeichen des
ascendenten / vnd zeichen des Mons gelegen seind /
güt glück in iren händeln vnd narung spüren / vnd in
gütem Friden sitzen. Wo aber die bedeüter verhindert
werden sein / beyde der Soñen vnd des Mons / auch
die Herzen ascendentis / bedeuts zukünfftiges vnglück
in allen dingen.

Das sibendte Capittel.

Regel vñ gemerck / die Finsternussen zu vrtheilen /
nach der lehr Ptolomei.

Ptolomeus was der behendest / von dem
ich gelesen hab / der geschriben hat von dem Ge-
stirn / vnd helt vil von der verwandlung / die da heist
Eclipsis / Finsternuß der Sonnen vnd Mon / vnd hat
dis gar klärlich erleüttert in ein büch Quadripartito /
da steht geschriben / was ein jegklich Eclipsis oder fin-
sternuß bedeüte / es sey der Sonnen oder Mon / vnd
wann die bezeichnung anfahet / vnd wann sie an dem
strengste ist / oder wanns ein end nimbt. Daselbst steht
auch geschriben / ob die bezeichnung böß oder güte sey /
vnd in welches landt die bezeichnung deute oder nit :
Vnd ist es böß / oder bezeichnet sie ein zerstörung mit
sterben / oder mit andern dingen / vber was sie komien
werd. Dann die zerstörung geht entweder vber men-
schē oder vihe / vögel oder fisch / oder ander Creatur /
vnd